

Turnfahrt 2020

Au im Coronajahr 2020 hets de STV Ermatinge gschafft eh Turnfahrt z'organisiere. Mit vollpackte Rucksäck hend sich alli Turnerinne und Turner am Bahnhof Ermatinge troffe, um de Weg is Appenzell aztrete. Nach ner amüsante Zugfahrt isch üsen erste Halt i de Brauerei Locher gsi. Wo denn au suscht...?

De Lag entsprechend hend mir leider nid id Produktion derfe, was üs direkt id Bierdegustation gführt het. De klassisch Kneiepgänger het doch grossi Auge gmacht, wo er gseh het, dass es nebe Schützepfütze und Heinecken no eh riese Uswahl a andere Sorte git. Mit fast scho chli zu gueter Lune het sich d'Gruppe nacher ufteilt. Die eine sind i de Gasse vom Appenzell go schländere, anderi hend mit Bäll uf PET-Fläsche gschosse und letzteri hend ihri jöhrliche Hacksessions wieder ufd Spitze triebe. Allgemein het sich d'Jassergruppe kei Möglichkeit entgah lah, eh neuu Rundi zstarte. Da hets au guet und gern mal de Fall si chönne, dass sich di Ältere (meh seit ihne au Boomer) uf de Bode setzed, um det wieter z'jasse.

Nachem Zmittag hend sich wieder alli am Bahnhof troffe, wo mir nach einige Zugstatione de Afang vo üsere Wanderoute atroffe hend. Nach aber nur 10 Minute laufe, isch üs ufgfalle, dass 2 (Boomer) us de Gruppe fehled. Ihne het de gigantisch Hügel scho vo Afang ah abglöscht, sodass sie es sich i de erstbeste Beiz gmüetlich gmacht hend. Aber au einige vo de «Wanderer» hends kei 5 Minute Laufe usghalte ohni z'jammere, was sie nöd für armi Lüt sind. Di letzte 100 Meter vor de Beiz ufem Hügel obe, sind für di eher weniger sportliche und die notorische Nörgler wie eh Erlösig gsi, zum ihre brennende Bei endlich ufelege z'chönne.

Nach de Wanderig und de Iquartierig im Zimmer hend sich wieder 2 Gruppe bildet, wos ums Znachtesse gange isch. Im Nachhinein betrachtet het beides sini Vor- und Nachteil gha. Die eine hend mit 6 Ravioli für 35.- CHF ned de Top-Deal usegholt, wobi sich die andere i de Metzgete komplett überesse hend, was sich denn am Endi vom Obig bi einige oral grächt het.

Guet usgeschlofe het sich de TV nach ner kurze Wanderig wieder zruck id Schuel begeh. Nöd wie mir das kennt hend, sondern eher so wie üsi Grosseltere id Schuel sind. Im Schuelhus Tintelompe hend mir bim Herr Bünzli en wirklich sehr unterhaltsame Nomitag mit exzellenter Chuchi gnosse.

Das isches denn au scho gsi. Danke Neo-Präsi Adrian S. für die tolli Turnfahrt!